

摘藻堂四庫全書薈要

集部

欽定四庫全書薈要

集部

御選元詩卷五十七

詳校官原任主事_臣李斯咏

欽定四庫全書薈要卷一萬八千四百六十九

集部

御選元詩卷五十七

七言律詩十六

吳會

次韻奉題吳彥貞華林別業

郡城南去有華亭花木成林竹繞汀
照影鳳皇臨月鏡
傳聲鸚鵡隔雲屏
分栽柳入陶潛傳
點校茶歸陸羽經
我亦延州老孫子
對江相望樂清寧

題崇山劉氏園亭

西山三疊鬱岵亭上看山翠欲飄楊柳小樓風滿席
芙蓉清沼水平橋美人歌處傾金杓仙客來時度玉簫
我憶醉眠花底月滿衣香露夜蕭蕭

王翊

送趙文善之湘陰守

前代王孫夙相家于今出牧向長沙神龍正喜騰霄漢
天馬寧容駐渥洼江水流漸初閣棹岳雲點雪又催衙

好懷忍向高人別
折贈寒梅驛路花

游莊

聞宋子瑜歸

朝辭幕府解戎衣
夕向空山覓紫芝
彈鋏自傷為客早
折腰方歎去官遲
蕭蕭白鴈西風勁
采采黃花夕露滋
却憶江波垂釣叟
白頭猶作帝王師

王中

漫興

小齋清寂雨晴初養拙生涯偶自如夢裏屢尋芳草句
病來慵寫絕交書烏啼綠樹輕煙暖花落閑階過客疎
却羨陶潛幽趣好長歌吾亦愛吾廬

初夏寄興

日長亭館倦琴書久病情懷偶自如苔徧空牆新雨後
泥香小徑落花餘耽閑會遣形骸累向老全將世味疎
風滿北窓清夢覺條然心境上皇初

雨後夕涼東友人

山中向夕雨初收
窓戶無人熠燿流
鳴杵幾家臨積水
征帆一片度危樓
涼陰滿地梧桐月
露氣涵香薜荔秋
誰道平生甘寂寞
夢闌偏憶太平遊

暮春即事

塵事勞勞兩鬢霜
愁將清鏡閱年光
磨礧歲月歸吟社
檢束生涯入醉鄉
草引閒情頻悵望
蝶隨春夢屢悠揚
覺餘一啜茶甌罷
短笛清風正夕陽

陳安

高大使吳淞歸興圖

楓落吳江白鴈飛天涯遊子正思歸香消夜月青綾被
涼入秋風白紵衣江浦蒹葭含宿雨驛亭楊柳帶斜暉
分明記得西湖上載酒蘭舟近翠微

中秋有感

畫省曾陪冠蓋遊華筵詩酒宴中秋星河不動天如水
風露無聲月滿樓皓齒纖腰催象板珠簾涼影上銀鈎
于今寂寞江城暮烏帽西風歎白頭

題高理瞻所藏小景圖

昔年為客楚江邊
雨霽江南二月天
楊柳畫橋深淺水
桃花春岸往來船
新篳白酒浮杯釀
旋買青魚出網鮮
因見畫圖驚舊夢
東風吹面鬢蕭然

效唐人送宮人入道

長門一別赴琳宮
寧復中官促綉工
紅葉人間無舊夢
碧桃天上自春風
步虛尚覺宸光近
歸院還疑輦路通
猶有內家簫管在
夜深吹向月明中

徐淮

送萬敏中之金陵

買舟又上金陵去風物應憐庾信才舊燕能言王謝事
夕陽空照鳳皇臺江邊商女猶教曲店下吳姬正壓醅
紫府青臺風雨近莫因登眺久徘徊

登松臺清秋有感

欲澆磊砢惟憑酒竹葉滿樽翻綠波敔帽正當風力緊
吹簫無奈月明何高林紅葉得霜醉故國青山入夢多

客子長懷有誰識
凭高一笑付清歌

華幼武

宿隱微山房

二月蘭舟泊上宮
春雲不雨玉壇空
苔生白石斑斑綠
魚養丹池箇箇紅
對酒燭分花底夜
出簾香散竹間風
高寒未覺仙臺遠
只此相逢似夢中

遊碧浪湖簡同行沈高士

浮玉山邊晚繫舟
荻蔣蕭瑟似新秋
碧天萬里寫銀漢

明月一輪當柁樓
每媿塵勞成白首
喜從仙御作清遊
酒杯未落南風起
又挂歸帆托順流

斑竹簾

湘妃淚灑碧琅玕
翦織疎簾拭未乾
細縷引風宜隔暑
濕雲含雨欲生寒
燈前照耀琉璃潔
月下爛斑玳瑁看
直幹盡輸兵革用
高堂舒卷莫摧殘

題陽山顧碧溪詩卷

聞說山中顧隱君
幽居不與俗人羣
愛看舞鶴護蒼蘚

淨埽落花留白雲
李愿已刊盤谷序
稚圭休擬北山文
一溪春水連天碧
肯著孤舟載月分

寄趙易窓高士慶雲岡上人

昨宵風雨釀春寒
曉色開晴露未乾
棋局定須尋李遠
杖藜還肯過蘇端
緡經坐榻呼龍守
點易虛窓倩鶴看
暫假飛鳬挽飛錫
樵蘇不爨罄交懽

秋夜有感

澤國秋來夜氣涼
飄零猶自未還鄉
蟋蟀泣露梧桐井

絡緯繅風薜荔牆只尺故園千里夢亂離華髮十年霜
仲宣樓上長回首烽火連山欲斷腸

葉顥

重九後菊

癡蜨狂蜂未用疑從來根性嬾趨時情知不少爭先輩
故遣遲開殿後枝斜日園林方冷淡西風天地特清奇
芳苞小蕊秋香老不是淵明斷不知

題幽居

隔谿春色兩三花近水樓臺四五家濁酒不妨留客醉
好山偏是被雲遮松根淨埽彈琴石柳下常維釣月槎
路狹不容車馬到只騎黃犢訪煙霞

乙未八月二十二夜夢宿山寺與僧講道論詩
不覺夜分僧賦一聯云鶴向白雲棲處宿僧從
青嶂影邊歸覺而微改其句足成一律云

天風吹夢過招提瘦策迢迢扣夕扉鶴揀白雲枝上宿
僧從青嶂月邊歸杉松韻古調清樂苔蘚痕深染敝衣

多謝山靈能念舊此心焉敢忘煙霏

二月江城見梅二首

二月江城第一枝怕寒故故著花遲不嫌豔杏夭桃俗
甘受狂蜂妬蝶疑月落西湖驚舊夢雪消南國憶當時
樓頭亦有霜天角嬾對春風煖日吹

桃杏紛紛正得時疎梅高潔合知幾如何萬卉嬌春日
猶有孤芳駐夕暉未要板橋尋蠟屐最宜沙路試羅衣
輕鞵小扇孤山下絕勝逋仙踏雪歸

述懷

形容枯似飽霜槎身老空山處士家一徑梅香雲滿地
半窓花影月籠紗常穿謝氏登山屐慣設孫郎餉客瓜
離亂固非疇昔比池塘難得為官蛙

九日感懷二首

門掩東籬處士家每逢佳節惜年華黃花有恨驚秋老
白髮無情對日斜杜牧仙遊詩寡和王弘人去酒須賒
烏紗醉裏西風冷千古令人憶孟嘉

悠悠江影鴈南飛
黃菊飄香蜨滿枝
斜日西風彭澤酒
殊方異國杜陵詩
煙巒慘淡山林暮
霜葉蕭疎草木悲
醉後不思時節異
半敝烏帽任風吹

元宵雪感懷

金帳羊羔酒裏仙
醉觀皓鶴下瑤天
寒英忽舞顛狂絮
香燄俄開爛漫蓮
閭苑有花春未老
芳城不夜月空圓
茅齋僵臥袁夫子
也翫鼃山嬾去眠

張洙

辛丑十一月望日藻仲宗弟率諸生抱琴見枉
草堂藻仲偶得風雨抱琴良不惡之句予愛其
深得興體因足成唐律

風雨抱琴良不惡連牀尤盡故人情書狂屢遣供佳札
飲少惟愁闢巨觥夜月忽於梅寫影寒雲不礙鴈流聲
看君却憶誰相似飯顙山頭太瘦生

盧煥

寄張藻仲

草堂又是經旬別江上梅花欲放春兩閱尺書煩見問
幾時尊酒復相親夜琴橫月彈山鬼曉鴈呵冰寫谷神
門外雪消春水滿往來舟楫不妨頻

曾朴

次友人韻

闔閭塚上見新城無復遊人載酒行山雉聽經依塔影
樹鴉爭食亂鐘聲劒池龍去泉空冽茶竈僧閑火獨明
我欲投簪營小隱佛香終日祝昇平

郭鈺

和虞學士春興八首

官河春水湧輕濤來往千艘不用篙江浦女遊遺玉珮
瑤池仙降獻金桃鞦韆拔地煙花暝閭闔中天日月高
早歲功名看得意扶遙風力送鴻毛

鳴珮天階委碧莎雪消太液漲晴波玉盤露浥仙人掌
宮錦花添織女梭王子問安回輦近儒臣進講賜金多
明朝引見狝狼使樂府新傳天馬歌

沙苑煙晴苜蓿肥朝回天馬錦為鞵詞臣會送歸青瑣
進士傳呼換白衣雲氣曉依宮樹近春陰晝護苑花飛
君王又進長生藥萬里樓船海上歸

城上觚稜霧靄迷角聲吹徹鼓聲齊雲生水殿龍常現
月滿官松鶴並棲風俗元存南國舊天文並拱北辰低
倚樓欲問通霄路誰借青雲百尺梯

萬里驅車入帝關十年棲息一枝安承恩數對麒麟殿
却老何資龍虎丹金水漲波融雪盡碧桃分蕊到春闌

江南却憶看紅藥
紉扇羅衣不識寒

清明煙散柳枝斜
宮樹沈沈點白鴉
煖霧撲簾成細雨
朔風吹面射飛沙
江南最憶王孫草
天上催宣宰相麻
十載滄洲孤舊約
鹿車何日共還家

柳林笳鼓曉晴饒
王子春蒐出近郊
雲錦宮袍攢萬馬
鐵絲箭鏃落雙鷗
蒲萄壓酒開銀甕
野鹿充庖藉白茅
共說從官文采盛
不聞舊尹賦祈招

浩蕩天風駕海航
忍從兒女問耕桑
珠聯魚目知誰識

劒吐龍光不自藏
司馬倦遊曾建節
買臣歸去密懷章
只今豈是無詞賦
材俊中朝少薦揚

賦得越王臺送萬載教司令之官

層臺高與越山齊
南斗諸星入地低
海氣秋澄鴻鴈到
野煙春合鷓鴣啼
官船北走輸珠翠
幕府南開振鼓鼙
側想到官多暇日
登臨長聽玉驄嘶

和虞學士登宜春臺

萬家平地擁高臺
窓戶層層近日開
鶴致瓊花迎帝子

龍持貝葉禮如來雲依老樹秋如畫峽東飛濤雪作堆
惆悵當年歌舞地碧桃開落幾千回

贈劉明道

義旗獻凱滿南州君擁兵符控上流隔岸人煙鄰虎穴
中江雪浪送龍舟劒鳴秋匣元霜下馬浴晴波紫霧浮
白羽指揮能事集底須萬里始封侯

分府同知瑤童相公大閱之日天使適至喜而
賦詩奉寄劉賓旭參軍二首

鼓角緣邊永夜哀使車忽自海南來中朝舊法三章在
大將新圖八陣開玉帳分明傳號令金臺雜選貯賢才
早看送喜麒麟殿五色雲中進壽盃

侯印軍符塞紫衢儒生白髮混泥塗兒騎竹馬談兵法
地盡桃源入戰圖雙劍舞閑歌激烈一燈愁絕照清癯
山中薇蕨秋風老心折孤村反哺烏

送朱鵬舉照磨赴江西省掾

花外銀鞍鞬紫騮省郎文采自風流英雄舊總三千士

美譽新傳十一州山擁宜春深帶甲江通章貢小容舟
晨趨黃閣參籌畫願審安危拓遠謀

寄劉賓旭

舊日相逢玉雪姿三年幕府鬢如絲波濤入海屠龍苦
風雨還山買犢遲客到定能頻換酒花開應不廢題詩
只憐雙劍牀頭吼又是鄰雞報曉時

和周霽海吳鎮撫詩就呈李伯傳明府

牛斗秋高劍氣橫幾人馬上取功名扇揮白羽臨風迴

甲鎖黃金射日明
賈誼自期能料敵
山濤誰謂不知兵
官軍蓄銳何時發
久厭城頭鼓角聲

社日

甲子頻書入短篇
細推五戊卜春田
讀書未有平戎策
止酒聊輸祭社錢
紅樹花穠春向晚
畫橋柳暝雨如煙
舊來歌舞今誰在
燕子茅簷只自憐

晚秋黿溪宴集

菊花香滿酒如傾
不謂艱危有笑聲
驚坐令嚴觥錄事

揮毫氣壓楮先生
虛嵐紫翠籠秋色
落木紅黃透晚晴
却憶桃源舊時路
漁郎重到不勝情

聞龍西雨自閩海間道抵家患目疾缺於展覲
先寄此詩

萬里征帆海上回
畏途行盡始驚猜
入門兒女牽衣笑
問字親朋載酒來
書有浮沈誰與送
眼無青白故難開
蕭蘭晚歲俱彫瘁
佳句惟應到野梅

二月初晴題淦西居人樓壁

老去才名久退潛樓前晴景逐人添雲連野樹深藏逕
風捲溪花亂入簾遠信忽傳閩徼外閒愁盡挂楚山尖
春光流轉曾相識獨怪經年雪滿髯

三月十三日夜宿淦西山絕頂

夜登絕頂幾千尺臨曉始知歸路遙水滿大江舟窅窅
塵飛客路馬蕭蕭山河勢窄如懸網雲漢光低不作橋
十二年間多少恨春來不共凍痕消

懷羅達則

溪山杖屨每相違
况復經年去不歸
移席花間春雨至
倚樓江上暮雲飛
鄉書到手兼悲喜
世事關心有是非
池上祇今新綠滿
待君同製芰荷衣

寄宋竹坡

久欲從君借竹看
東風又長碧琅玕
午陰坐久晴雲落
夜漏眠遲白露漙
韭葉連畦從料理
菊花分徑共平安
洞簫一曲裁新管
石上雙吹翠袖寒

和楊茂才閒居

板橋通徑薜蘿深
濃翠浮衣竹十尋
啼鳥漸馴時近客
歸雲不動似知心
翦苔盤石移碁局
添火香篝續水沈
賦筆惟應潘岳好
恨無樽酒與同斟

荅楊和吉韻

白髮侵尋暮景來
埽除無策覆空盃
江山每與愁俱到
風雨不知花盡開
往事謾存元祐迹
少年何羨洛陽才
惟君於我過從近
握子朝朝埽綠苔

訪友人別墅

陰森萬木曉蒼茫路轉山腰問草堂池湧慢波萍葉散
窓涵細雨橘花香讀書程度輸年少中酒心情厭日長
公子飄飄才思闊何妨高詠伴滄浪

和李士周韻

春雲乘雨午橋陰病眼看花負夙心漢水盡堪添綠酒
燕臺何得築黃金手攀楊柳親曾種路出桃源不易尋
畢竟知音眼前少塵埃三尺暗桐琴

寄李亨衢

君住仙壇歸路遙
人間塵慮盡冰消
微風半脫烏紗帽
明月閒吹紫玉簫
出水芙蓉鳴翡翠
繞牆薜荔護芭蕉
日長應共羅浮客
時復松花酒一瓢

和酬宋竹坡韻

寄詩問我山中事
性懶家貧一事無
春甕酒香梅未落
午窓夢起鳥相呼
舊來叔夜交游絕
老去文通筆硯枯
鷗社共盟君未棄
何須馳志向伊吾

寄王進士

并序

伏覩前鄉貢進士王禮子讓所刻長留天地間集
辱收謬作廁其間心竊愧焉而誤名為昂因筆寄
意

老去群書逐夢忘青燈白髮夜淒涼平時誰信班生策
落日空懷陸氏莊天為國家生俊傑地居臺閣盛文章
鄙夫空谷逃名久不謂人間有郭昂

寄贈皇厓壇劉鍊師

壇下溪中出
白石如水晶

神仙宮館近青冥紫翠峰巒開畫屏日射水晶江石白

雲封琥珀嶺松青虎司丹鼎知留訣鶴立瑤壇聽說經
相約安期今夕至靈風遙想滿虛櫺

病目寄宋時舉

丁丁伐木最關情病起秋風畏客程隔霧看花生眼纈
誓天止酒閉愁城荒村茅屋白煙起落日楓林紅葉明
青壁丹崖長在望冷蟬瘦影獨心驚

和荅彭中和

長向春山數別期春花次第報君知舟迴剡曲緣何事

劍合延平在幾時
庭院暖風花氣入
池塘微雨鳥聲低
甕頭酒熟邀誰共
悵望歸雲獨拄頤

二十六日晴過湛塘

布袍稍覺曉寒輕
晴色偏饒雙眼明
山逕黃泥攢虎迹
寺門蒼樹挂猿聲
重來誰與同心膽
老去惟思避姓名
枯柳橋西曾識面
獨回青眼遠相迎

和袁方茂才秋夜宴集

下馬階除問錦幃
羅衣花白縷金圍
月明湖水龍吟細

雲度吳山鴈到稀楊柳舞低牙板促木犀香滿羽觴飛
袁郎自是風流客舊約秦臺願不違

胡悌

贈章伯高

共是多情惜歲華故應美酒送生涯金齋細斫秋風鱸
玉髓新烹穀雨茶每愛芙蓉依北渚還思蝴蝶過西家
江南三月鶯啼遍不信櫻桃未著花

劉永之

周所立江村草堂

將軍舊日曾分祿為結茅堂草覆檐過橋柳暗烏爭樹
當戶花開燕入簾醉書江石兼雲冷晚飯山苗帶露甜
之子多才空白首獨將詞賦擬江淹

雲臥山房為了上人賦

空山雲臥杳難尋惟許人間禮磬音龍起盃中生片影
鶴歸仙頂結輕陰化為法雨霑衣濕散作天花繞座深
去住了然無定著祇應猛虎識禪心

仙溪書院為何能舉賦

江海歸來兩鬢霜
仙源深處結茅堂
參差樹映春山遠
窈窕橋通碧澗長
金匱藏書遺鳥跡
石田種玉起虹光
只愁來往迷花嶼
預擬藤陰問釣航

淵明入社圖

空山樓觀遠蒼蒼
路出深溪石磴長
近瀑飛雲經樹濕
穿花流水過橋香
高僧喜識桄榔杖
稚子歡迎薜荔裳
入社幾時還入社
松陰十里到柴桑

贈別傅商翁

蔗園瓜地楚山春
野屋梅花照雪筠
鄰甕共開桑落酒
客衣猶帶豫章塵
舊彈長鋏馮驩老
新著衡書季子貧
夢遶西州歸鴈遠
何時同采暮江蘋

為高安何思恭題方壺所畫山水

古象山中白晝閒
紫煙樓觀鳳笙寒
試分玉井三秋露
戲寫方壺九疊山
老樹模糊常帶雨
茅茨瀟灑鎮臨湍
知君隱處渾如此
持向荷峯錦水看

題巴丘龍母廟

天開玉峽兩厓丹，隔岸諸峯似翠鬟。
神女不歸龍已化，仙翁飛去鶴空還。
碧壇芳草經年合，古殿蒼松落日閑。
萬里長風起天末，如聞環珮白雲間。

寄淦川友人

廢郭浮煙合綠蕪，茅茨星散縣樓孤。
江連戈舫鳴春鵲，樹對寒燈起夜烏。
古研自磨銅雀瓦，坐壇還疊蜀賓罏。
市南美酒梨花白，最憶青絲繫玉壺。

送銚子堅之袁城

雪色征袍拂曙飈，宜陽西去思飄飄。
千峰靜對芙蓉幕，三峽遙連螭蜨橋。
擢得雀舟衝雨緩，借來驄馬向春驕。
青年書記相知久，共按秦箏和玉簫。

讀黃危二閣老送何彥正歸省詩序追賦一首
水滿金溝柳著霜，行人驅馬上河梁。
公車未奏三京賦，祖道爭持五色裳。
班固文章傳太史，鍾繇書法繼中郎。
澗河夜雨燒銀燭，坐聽疎鐘憶建章。

題鄒惟中西樓

西樓遠對鼎山斜
野客來尋駕鹿車
竹嶼暝煙浮翠黛
石田秋雨潤銀沙
清尊未酌心先醉
往事重論鬢欲華
肯借溪南三畝宅
從君學種邵平瓜

用韻送梁徵君孟敬還石門

渝曲經年不見君
偶同江郭看飛雲
蚌還乍喜雙珠合
龍躍終愁兩劍分
蹤迹每同樵客隱
姓名已被世人聞
暫隨郡邑還歸去
應念山中白鹿群

和友人過象牙潭韻

一曲寒山照水清，哀鴻驚鵲亂江聲。
浪翻白雪千尋險，天接浮雲萬里平。
前輩總隨煙霧盡，虛名真似羽毛輕。
高懷欲棄人間事，同向天台訪赤城。

寄西峰李緯之

漢家仙吏駕雲螭，遺迹空存碧蘚滋。
井底龍飛山客見，峯頭鹿過野人知。
芝田舊長千年藥，石室新題五字詩。
寄語山中李道士，好將苦學慰深期。

寄梁孟敬

菰山之陽隱者宅日午隔溪聞讀書時有門生陳八簋
再從家僕致雙魚石門雨過簷簷濕革戶秋深薜荔疎
已約暮春攜稚子詠歸沂上曳輕裾

到郡不入城寄彭聲之雪印大虛

鳳洲秋水日漸漸江水渾如博士衫草屋結來人假宿
檄文書就手親緘裁詩久愛中丞麗制酒難禁吏部饒
相見立談還即別寸心搖曳似風縈

題宋能敏青壁軒

沓嶂層巒翠幾重
神光動處有奇逢
霧生深谷藏元豹
泉落陰崖化玉龍
丹篆曉書朱露濕
碧窓晝掩白雲封
何時攜我青藜杖
結屋來依五粒松

貢性之

送葉南夫

君家盛事古今稀
九十雙親七十兒
四百人中同戍日
八千里外獨歸時
尊前舞袖花前酒
畫裏關山卷裏詩

親故爭傳看遠客不妨銀燭夜筵遲

越山清曉

曙光晴散越王臺萬壑千巖錦繡開
敲枕僧鐘雲外落
卷簾漁唱鏡中來
樹藏茅屋雞聲斷
露濕松巢鶴夢回
安得畫圖分隙地
移家仍住小蓬萊

夜聞漁歌

一聲高徹一聲低
憑仗東風度水西
著意聽時腔轉細
斷人腸處思先迷
鴈驚何處沙邊渚
船泊前村月下溪

不道客愁愁不醒要隨羌管入雲齊

寓毗陵旅邸

月光涼墮夜堂深草草杯盤款款斟歡喜情懷無復舊
別離時節又從今坐銷爐篆清煙細聽徹壺籌玉漏沈
關隴抵緣頻作客翻令兒女訝鄉音

送別

江上船開起櫂歌離愁無奈故人何桃花流水春三月
楊柳東風雨一蓑送別轉嗟形影獨相思從此夢魂多

到時定有平淮策勛業終歸馬伏波

約遊山阻雨

春事無多苦未晴數來花信過清明都將酒債兼詩債
付與風聲共雨聲燕落香泥霑紙重蝶翻飛絮入簾輕
懷人久負南山約縱有南山不可行

接曹孟圭

曲江新漲黃梅雨雨裏客船江上來對酒肯辭今夕醉
有懷能向幾人開歌傳皓齒香生席舞按纖腰月滿臺

縱是金吾嚴禁夜也須容我更遲回

送陸景宣靖州從軍

蠻荒溪洞極邊頭
仗劒從軍憶壯遊
楊柳春風千部落
旌旗曉日萬貔貅
路經彭蠡洲前過
江自巴州峽外流
早報遠人歸聖化
貂蟬從古出兜鍪

喜魏仲房見過

江上柴門掩夕暉
客來剛被鵲先知
出迎不較衣翻著
對飲寧辭琖倒垂
話到更深無斷處
起看月落幾多時

人生恨不如潮信暮去朝還有定期

題畫壁

何處江山似此佳看君圖畫欲移家沙邊洲渚潮渾沒
雲裏樓臺樹半遮叢桂漫歌招隱賦種桃誰識避秦花
晚風吹送歸舟急一片征帆帶落霞

雪竹山房

此君節操獨凌寒冰雪叢中更耐看簾幙影迷金鎖碎
珮環聲動玉闌干只疑元圃翻瓊樹錯訝瑤臺舞素鸞

白戰幾時能著我萬竿深處一憑闌

次萍居留別韻

且勿長亭折柳枝離筵已判酒如池因思會面難期處
直使銜杯到醉時檣燕留人雙上下岸花迎客半低垂
計程明日毗陵道吟寄新詩欲倩誰

水竹軒

萬竹蕭蕭水繞門九街車馬自晨昏晴天波影搖窓戶
靜夜秋聲入夢魂曾為故人頻下榻每因佳客屢開尊

百年清致今猶昔春雨深深長子孫

城南耕隱

愛爾城南隱者居春田繞屋下春鉏兒孫候暖晨驅犢
燈火分涼夜校書入社有懷占樂歲趨朝無夢候公車
相逢自歎飄零久投老歸來媿不如

贈別鄉友芮公

老去親朋見面稀見時無計得同歸遊絲落絮都成恨
社燕秋鴻各自飛杜宇叫殘孤館夢西風吹老故山薇

明年春雨南湖漲擬把長竿坐石磯

瑪魯

題葉隱居雪篷

朔風吹雪滿溪灣一葉憑虛獨往還
擊楫正思歌玉樹舉頭驚見失青山
曉窮滄海模糊外夜泛銀河浩蕩間
笑殺當年韓刺史苦寒騎馬渡藍關

盛或

送何彥文歸堦水

東海何郎雪滿頭新聲一曲擅風流酒邊蘇小西湖路
夢裏揚州明月樓片片桃花吹畫鷁行行柳色亂春鷗
可憐冠蓋皆塵土莫倚清尊說舊遊

滑壽

遊白水宮

白水仙宮也罕逢十年兩度追陳踪寒流光垂玉蟠螭
晴巒秀削金芙蓉臨溪無魚石磊磊采藥有路雲溶溶
明當挾我九節杖更來陟彼三台峯

丁鶴年

兀兀

數莖白髮鏡中新
兀兀窮年媿此身
萬里雲霄雙倦翼
千尋江漢一窮鱗
望鄉薄暮憑西日
去國中宵禮北辰
客路漸遙身漸老
此生何以報君親

靳公子

中朝公子多才俊
蕭灑風塵獨靳侯
白鴈久無天上信
黑貂漸敝雪中裘
虛堂簾影遲遲晝
別館燈光淡淡秋

到手深杯須劇飲醉鄉消得古今愁

雪後泛東湖

雪後湖山玉作圍小舟乘興弄清輝貪看月裏鸞回舞
不覺風前鷁退飛雲母屏空春闌寂水晶宮冷晚霏微
仙家一笑乾坤老誰馭瑤池八駿歸

題鳳浦方氏梧竹軒

鳳鳥曾聞此地過至今梧竹滿丘阿政懷翦葉書周史
却恨翻枝入楚歌金井月明秋影薄石壇風細晚涼多

中郎去後知音少共負奇才奈老何

奉寄王宣尉兼呈九靈先生

別館新成足宴游
珊珊環珮總名流
獨推南郭為高士
共識東陵是故侯
天上鶯花三月夢
人間風雨五更愁
行藏盡付浮雲外
爛醉豐年黍稷秋

寄餘姚滑伯仁先生

獨木橋邊薜荔門
全家移住水雲村
猿聲專夜丹山靜
蜃氣橫秋碧海昏
詩卷自書新甲子
藥壺別貯小乾坤

陶漁耕稼遺風在差勝桃源長子孫

樊口隱居

萬里雲霄斂翼回挂冠高卧大江隈
春深門巷先生柳雪後園林處士梅
翠擁樊山邀杖屨綠浮漢水映尊壘
誰能領取坡仙鶴月下吹簫共往來

戲贈劉雲翁

千金不惜買新聲贏得風流老更成
銀甕蒲萄浮臘蟻金屏窈窕轉春鶯
香凝宴寢頻開席花暗閑房合度笙

夜燕未終賓客醉莫將明燭照華纓

長江萬里圖

右逾越雋左蓬壺萬里提封入壯圖斷石雲屯山擁蜀
驚濤雪立海吞吳蟠桃有實來青鳥若木無枝駐赤烏
秦漢經營人盡去獨留形勝在寰區

戲贈應修吉

硯溪居士神仙侶短髮蕭蕭雪滿簪暖老恨無燕趙玉
養生賴有坎離金牀頭酒熟留僧飲席上詩成對客吟

金
卷五十七
歲晚山空誰是伴北窓梅月最知心

夜宿染上人溪舍

雲去禪關戶牖空清溪碧樹有無中倒涵天影魚吞月
逆戰秋聲犬吠風見性本圖先作佛勞形翻媿早成翁
杜林老去歸無計來往那辭惱贊公

寄西湖林一貞先生

錦繡湖山世絕稀東風不放賞心違芙蓉楊柳臨清淺
佛剎仙宮繞翠微畫舫載春天上坐紫騮馱醉月中歸

高情獨有林和靖門掩晴空看鶴飛

海巢

海上巢居海若降三山眼底小如砭已攀若木為華表
更立搏桑作翠幢蛟室夜光晴燭戶蜃樓秋影冷涵窓
鷓鴣夢斷無因到惟有同棲鶴一雙

渡鄞江後寄陸時敏陳可立

小艇橫江捷似飛故人凝睇送將歸過山殘照明紗帽
渡水浮雲亂葦衣沙鳥水鷗同泛泛岸花汀草各依依

風塵來往慙經濟
擬看漁蓑坐釣磯

元夕

燈火樓臺錦繡筵
誰家簫鼓夜喧闌
光移星斗天逾近
影倒山河月正圓
金鎖開闔明似晝
銅壺傳漏迴如年
五雲不奏霓裳曲
空使揚州望眼穿

九日登定海虎蹲山

東海十年多契闊
西風九日獨登臨
天高雲靜鴈初度
水碧沙明龍自吟
籬下菊花憐我瘦
杯中竹葉為誰深

凭高眺遠無窮恨去國懷鄉一寸心

避地

避地長年大海東蕭條生計野人同
深春耒耜孤村雨落日帆檣遠浦風
那得文章偕隱豹聊將音問託歸鴻
平生自恨無仙骨五色蓬萊咫尺中

題東湖青山寺古鼎銘長老鍾秀閣

手開樓閣貯群經面對湖山衛百靈
玉鏡夜寒通沆瀣翠屏秋靜倒空青
避煙鶴起簷間樹行雨龍歸几上舁

我亦逃禪雲水客便應蕭散共松局

山居呈諸道侶二首

日日看山眼倍明更無一事可關情
掃開積雪巖前坐領取閑雲隴上行
不共羽人談太易嬾從衲子話無生
剴然時發蘇門嘯遙答風聲及水聲

嬾散形骸不自持黃冠聊束鬢邊絲
頻來猿鶴渾相識久混龍蛇竟不知
養拙最宜情淡泊全生深藉德支離
看雲本自忘飢渴況有冰泉與石芝

次小孤山

峽束千雷怒，擊撞危峰屹。
立壓驚瀧山，聯廬霍朝三。
楚水落荆揚，限九江鎮海。
重關當第一，擎天孤柱故無雙。
珮環月夜知何處，露濕蓬萊玉女窓。

題風雨歸舟圖

昔向滄浪弔獨醒，中流風雨正揚舲。
江空風捲潮頭白，野曠雲迷峴首青。
挂席正思遺珮浦，推篷已過濯纓亭。
襄陽耆舊今安在，撫几長歌對畫屏。

奉次虞侍講先生見貽韻

玉堂棄蹤若浮雲無奈雞林遠購文推轂近聞推漢士
避名寧計却秦軍芝亭花發春醪熟鴻閣詩成夕磬聞
一飯未嘗忘北闕鼓琴誰識和南薰

吉雅摩迪音

寄穆爾古蘇院判

將軍辛苦事戎行麾下論兵總俊良沙漠蘇卿多感慨
鑑湖賀老自清狂風塵滿眼青山舊天地無私白髮長

萬里君親俱在念扁舟何日賦滄浪

遊定水寺寄杜堯臣

水紋藤簟竹方牀山閣重陰雨後涼
新月梧桐秋已老孤燈機杼夜初長
白魚入饌松醪熟紅稻供炊筍脯香
雲樹芝泉隨處好一時清賞肯相忘

蘇

鶴年弟盡棄紉綺故習清心學道特遺楮帳資
其淡泊之好仍侑以詩

誰擣霜藤萬杵勻製成鶴帳隔塵氛
香生蘆絮秋將老

夢熟梅花夜未分枕上不迷巫峽雨牀頭常對剡溪雲
竹爐松火茶煙暖一段清貞盡屬君

阿里沙

題九靈山房圖

夢裏家山十載違丹青咫尺是耶非墨池新水春還滿
書閣浮雲晚更飛張翰見機先引去管寧避亂久忘歸
人生若解幽棲意處處林丘有薜薇

題前餘姚州判官葉敬常海隄遺卷

潮汐東來勢蹴天一隄橫捍萬家金陵遷谷變人誰在
海晏河清事獨賢曉日山川神岳跡秋風禾黍有虞田
河渠他日書成績應並宣房與代傳

題鍾秀閣

檻外澄湖平不流窓間疊嶂屹將浮煙霞五色錦屏曉
風月雙清瑤鏡秋蒼蘊濃香吹法席芙蓉涼影蕩仙舟
結巢擬傍雲松住迴首朝簪愧未投

吳惟善

寄東海鶴年賢弟

鶴臯東望接三山
海上群仙日扣關
虎守月爐丹鍊就
龍吟霜匣劍飛還
故園松菊餘三迳
老屋煙霞恰半間
為問林泉逃世者
如公今有幾人閒

邵永

次復菴學士賢姪寒食雅韻

郊原春色正丰茸
藍酒榆羹引興濃
寒食庖廚煙竈冷
踏青巷陌翠簾重
隨風細草無端綠
著雨疎花為改容

味道澄心方宴坐
隔林孤起午時鐘

清明再用韻

暮春一日花紅茸
頓覺園林晴色濃
幾個沙鷗輕片片
數行煙柳自重重
學知老大終無補
髮白今朝不改容
正好出郊閑極目
莫教和恨聽疎鐘

方道叡

和汪百可見寄韻二首

黃塵席帽黑貂寒
歸卧懷慙飯一餐
但有桑麻依杜曲

何須勲業夢槐安江山千里客愁集風雨三更春事闌
却笑今年衰嬾意閉門深睡落花殘

脩竹吾廬五月寒飯香吹麥腐儒餐綠陰黃鳥北窓午
清簟疎簾一枕安夢覺忽驚詩思好心閑並覺宦情闌
千年擾擾成何事笑似棋枰著未殘

和以敬兄韻

莫怪旁人笑我愚知非曾向玉堂居恩光夜賜金蓮燭
記注晨修石室書幸接鴛鴦通禁籞敢將苜蓿詠盤蔬

清朝不草相如檄
棘道巴羌久破除

趙汭

和唐縣尹山居三首

早從上國接英遊
晚卧滄江擅一丘
無復謝公攜處妓
空餘陶令去時舟
千章古木排雲起
一派寒泉傍石流
客至不須談世事
小亭已扁四宜休

絕無塵土到幽局
手把離騷傲獨醒
弁嶺晚來雲自白
六湖春盡草長青
沙邊忽復飛鴻鴈
屋角隨常鳴鵲鶯

莫對江山重回首乾坤萬古一郵亭

塵事紛紛未有涯一舟聊復信年華
閑過角里先生宅謾訪孤山處士家
有酒何曾留俗客無錢猶自買梅花
新詩寫就人先覓醉筆淋漓整復斜

和葉中茂過訪見貽

早識長材歎陸沈逢時况復重南金
少年漫說從軍樂志士常懷報國心
已見奇功書幕府每傳佳句到山林
孤燈偶共抽青簡夜雨寒窓感慨深

屏山即事時周明甫來訪

地近仙巖日自長
短牆時度竹風涼
樓頭古木禁秋雨
檻外危峯倒夕陽
高榻坐聞金奏響
小橋行近翠盤香
清談況復陪賢達
始信他年未易忘

棲真別館贈松高鍊師

艤棹青林翠欲流
尋真勝復話英遊
上方道士紅雙頰
別館仙翁碧兩眸
絳節朝回瓊島近
金丹時就石壇幽
投書欲與鄉人別
長伴群仙駕十洲

唐伯庸以詩謝作讀書林記次韻荅之

塵居原不見紛華矮屋疎籬只一家雪後松筠初換葉
春深桃李自開花讀殘青竹無人到覽罷黃庭日已斜
此道從來成寂寞似君端合向人誇

與葉宗茂遊山村

村北村南春事幽故人亂後得相求倉皇屢作經年別
邂逅能無一日留丁令歸時空有恨虞卿窮久不須愁
卜居共愛清溪好先向沙邊具小舟

海月巖二首

踏盡崔嵬倚石門，海風山月滿巖巒。
自言仙室依蓬島，不覺人寰變廣寒。
千載揚塵安可測，一杯對景且為歡。
巖前浴日皆詩景，喚醒東坡仔細看。

架巖鑿石有規模，不學桃源舊畫圖。
亭上人稀林鳥樂，錫飛天老野雲孤。
雨餘石井泉深淺，煙淡虎門山有無。
說與山靈莫分別，從教仙穴看浮屠。

金消

寄友人宋邦彥

故人別後見尤難彼此詩盟尚未寒
寧暇對牀論契闊
謾勞折簡報平安
春山裂竹愁如海
流水落花紅滿灘
九十春光都過了
諸君何以罄交歡

重遊光明寺

梵王宮闕倚崔嵬
積翠繽紛圖畫開
啼鳥避人穿樹去
老僧迎客下山來
栽詩石逕書青竹
散髮雲林卧綠苔
自識箇中幽興熟
杖藜何惜重徘徊

送李子威之金陵

金陵自古帝王州策馬飄然作勝遊一代衣冠新禮樂
六朝文物昔風流此時送別詩盈軸何處相思月滿樓
若見潛溪宋夫子勿云江漢有扁舟

喜雨寄楊伯容

江城曉夜雨浪浪并作芳齋六月涼倚杖出門田父樂
題詩呼酒野人狂不愁戰地多兵甲遂喜豐年足稻粱
問訊草元亭上客竹林疎簟夢秋光

秋暮會楊仲章

矮褐淒涼淹別館故人一見話綢繆
溪頭水落魚龍夜塞北雲深鼓角秋
爛醉豈知猶是酒相逢誰謂不封侯
江湖明日重分手滿眼西風獨倚樓

清德晚歸

酒留詩戀意遲遲回到中塗已落暉
小蹇引秋行落葉老漁隈冷坐危磯
山間明月隨人出松外閑雲伴鶴歸
試問夜深何處宿欲從山下扣禪扉

方學士招飲不赴

我在林間鹿與羣君為天上玉麒麟
莫將綵樹燈前酒來醉梅花月下人
白屋不生三閣夢青山那識五陵春
行吟每到看松處自有漁樵作主賓

送張學諭歸三衢

穩泛靈槎訪斗牛未容歸伴赤松遊
蓴鱸此去無千里雞黍相期在幾秋
澌水月寒梅入夢繡湖煙淡柳分愁
春風莫問田園計須趁功名在黑頭

夜泊蘭江

江山歷朗雪初融
坐見宵分碧落空
世景固知光霽少
人生多在別離中
影隨月下成三友
春到梅邊第一風
此夕此情聊復醉
馬蹄明日又西東

秋日山中

不記秋風幾日晴
偶來林下見雲生
野梧半脫無多影
山雉驚飛忽一聲
短錫引船僧渡水
小輿聯擔客歸城
溪頭聽得漁翁說
近日前村酒價平

秋日客中

久客歸來靜閉門
秋風落葉自紛紛
夜來一暖做成雨
早起滿溪流
出雲山色祇宜閒
裏看鴈聲那可客邊聞
黃花開遍歸無計
吟老秋光又幾分

富陽舟中

終日推篷對酒杯
漁郎隔浦櫂歌回
路傍古屋無人住
山下疎梅獨自開
幾處汀洲分鴈下
滿江風雨送潮來
白頭篙叟休相促
明日天晴上釣臺

城中歸志喜

城郭多時得一歸
小園幽館雅相宜
種荷池暝便鷗睡
儲粟鉸空慮鶴飢
兩屐苔痕人立處
一軒秋影月來時
靜中自得其中理
此意無人會得知

曉發金華

一帶寒林古木齊
濛濛山色亂雲迷
沿村問酒難尋店
隔岸呼舟欲渡溪
夜雨草深蛙鼓鬧
曉風花落子規啼
可憐客路多岑寂
何處垂楊駐馬蹄

村舍

幾村桑柘遠相連
村北村南小渡船
茅屋有緣臨水住
閒身無事看山眠
孤林欲暮鴉爭樹
一雨及時人種田
昨夜隣翁喜相報
今年依舊是豐年

春日過繡湖


湖上晴光麗物華
行行幽興浩無涯
林頭新店去沽酒
門外小盆來賣花
天氣已非三令節
春風多在五侯家
茅菴兀坐無餘事
靜看遊蜂報午衙

病後自吟

地僻柴門少客過
寂寥生計奈愁何
秋來得雨涼偏早
病起緣詩瘦更多
鶴立露枝黃
墮葉鷗飛煙渚翠
翻荷
幾回夢入江湖
擢笑看雲山卧綠蓑

御選元詩卷五十七

謹案卷五十七第三十三頁後六行穆爾古蘇舊
作邁里吉思今改





總校官庶吉士臣侍朝

校對官檢討臣蕭九成

謄錄監生臣朱文佐

欽定四庫全書會要

集部

御選元詩卷五十八

詳校官原任主事臣李斯咏



欽定四庫全書薈要卷一萬八千四百七十

集部

御選元詩卷五十八

七言律詩十七

謝應芳

除夕和諸葛用中韻

盡道王門可曳裾
青山吾自愛吾廬
新年且醉屠蘇酒
舊業重修種植書
堂上弄雛慈母喜
階前繫馬故人疎
東風一樹梅花雪
折得南枝報鯉魚

陳伯大先輩偕邾中義陳容齋張子毅見過酒
邊以茶瓜留客遲分韻得茶字

白鶴溪清水見莎溪頭茅屋野人家柴門淨埽迎來客
薄酒留遲當啜茶林響西風桐墮葉雨晴南畝稻吹花
北窗幾箇青青竹題遍新詩日未斜

丹陽陳天倪及其弟剛中奔牛陳心遠諸羽士
避兵洞庭山寄此代簡

洞庭林屋聚羣山問訊曾逢賣橘船湖上白魚多滿尺

山中朱果不論錢仙家犬吠雲連屋澤國龍吟月滿天
辟穀有方煩寄我吾將多與世人傳

顧國衡萬戶席上與乃翁及元璞長老數客把
酒賦詩各成七言四韻

客來寒食清明日每日清風醉玉山
綵筆醉題鸚鵡賦
寶香頻爇鷓鴣斑
簷前脩竹翠欲滴池上小桃紅更殷
按得錦箏新製曲隔花黃鳥共間關

子英云玉山顧隱君今於同里法喜寺樓居日

鈔佛書至午而止餘暇則吟咏不輟雖親舊來訪亦不往荅焉余因子英復去作此代簡

客來喜得平安信蕭寺樓居日掩扃湖近浪搖窗影白
地偏苔沒屨痕青羣賢方結蓮花社小楷猶鈔貝葉經
歲晚扁舟歸甫里好尋漁父過寒汀

奉寄楊鐵崖先生

光範門前三上書先生曾為發長吁畫橋楊柳藏書屋
鐵笛梅花落酒壺偶遇故人論北海相思一夜夢西湖

由來海內誇長句肯寄浮家野老無

再和韻寄趙彥深

平原公子午橋莊草木當年雨露香
桂樹不嫌招隱士桃花應喜識漁郎
錦茵醉酒冬宵暖冰檻垂綸夜月涼
我亦欲拈橫玉去為君三弄踞胡牀

寄章彥復

蘭省歸來日未斜閉門塵靜似山家
教兒楷字謄詩藁遺客生綃寫墨花
太伯祠前人走馬姑蘇城上樹棲鴉

知君觴處多懷古忍聽吳趨唱小娃

和陸宗魯韻贈夏師魯

百斛葡萄賸有餘一官不換只閑居
窗含煙氣虞山近門掩秋聲栗樹疎
鴻鴈去來知幾度雞蟲得失竟何如
丈夫高蓋非無日聊遣閑情賦子虛

過震澤留別智愚隱長老蘇昌齡先生

淞江太湖春水生湖邊白鷗尋舊盟
遠公沽酒壯行色坡老賦詩慰別情
燕子日長書屋靜柳花風颺釣絲輕

相過不負青山約一櫂夷猶兩日程

劉旭齋過婁江客舍作詩贈之

正欲題詩寄草堂遠勞移櫂過滄浪十年同飲三江水
一笑相逢兩鬢霜田野無人鴉種麥漕渠通海蟹輸芒
憑君莫話悲秋事且復持杯送夕陽

馬公振以久雨懷思作詩見寄適千墩諸友朋
為謀道旁之舍因和及之并發巨浸之歎云

芳草萋萋春復春桃花應笑未歸人數椽矮屋清溪曲

一箇扁舟綠柳津且與往來乘款段從教圖畫上麒麟
老妻頗勝劉伶婦不惜春衣典酒頻

次韻荅許君善

小徑迂回草欲迷村居如在瀼東西為煎新茗頻敲火
自掃殘花恐污泥白首十年吳下客傷心千古越來溪
羣賢何日能相顧重為湖山一品題

和陳思忠過王德修草堂

曲塘柳岸似蘇堤編戶菑畬比鄭陂春日鶯花圖畫裏

秋風雞黍古人期
開樽許共傾
蕉葉出妓應教舞
柘枝
老我杖藜慵出入
草堂遙望為題詩

黃宗禮

星查池館東牀客
冰玉襟懷我所知
百榼葡萄春濫濫
一闌芍藥晝遲遲
門前送却催租吏
枕上還吟夢草詩
只恐繡幃人早起
又催京兆畫蛾眉

寄題無錫錢仲毅煮茗軒

聚蚊金谷任葦羶
煮茗留人也自賢
三百小園陽羨月

尋常新汲惠山泉，星飛白石童敲火。煙出青林鶴上天，
午夢覺來湯欲沸。松風吹響竹爐邊。

贈董明府惠炭

范叔寒多正不禁，烏薪重惠比烏金。賒來脫粟忙炊粒，
留得焦桐好製琴。環堵一龕春盎盎，麗譙三鼓夜沈沈。
硯池冰釋龍香暖，寫我朝來抱膝吟。

徙居橫山口號

為愛橫山山水清，山前築室小溪縈。老夫枕石看雲臥，

兒輩求田候雨耕古井寒泉龍有宅孤村夜月犬無聲
廿年兩眼風塵暗猶喜如今見太平

重遊虎丘寺

不謁閭丘謁虎丘幅巾藜杖興悠悠飄蕭白髮三千丈
來往青山八十秋寶地近曾為戰壘劒池今復屬禪流
老松知我題詩意也學生公石點頭

次韻自述

百年有限恥求仙數口無飢賴薄田菰米熟來連日雨

菊花開到小春天方從易外窮義畫無復詩中泥鄭箋
客至酒杯時一舉開籠放鶴舞踆躔

過顯慶寺

六載重來釋氏家一甌新啜趙州茶杏花風後春何冷
柏子庭前日未斜拄杖賴能無潦倒闕文煩為補楞伽
要聽說法頻來往且喜平橋路不賒

懷詹伯遠

蚪蚪殘書補未全齋居一榻坐來穿楊花繞屋白如雪

溪水出湖青接天冠蓋不來騎馬客鷗鳬長傍釣魚船
多時欲問平安信伏日題詩寄竹邊

次韻送秦文仲歸海上

漂水先生挽不留故山回首鬱相繆落花飛送九年客
行李歸來一葉舟勲業鏡中成白首耆英會上冠清流
獨憐詩社今寥落無復尋盟集舊鷗

沈貞

湖上

遠水晴山湖上村柳花飛雪擁柴門魚吹浪沫翻萍葉
烏浴隄沙糝草根獨老一區揚子宅誰爭三里謝公墩
清吟冷館無聊賴皓首空招楚客魂

張庸

揚子江晚泊與同舟劉伯瑾諸公

東郭倦客家何許北固鐘聲暝却聞小汛候潮船已泊
上弦看月鏡初分憑君貰酒酬三益且自題詩咏五君
謾憶南湖垂釣處磯頭新水綠生紋

錢應庚

閏正月得復孺先生見教去冬寄懷之詩謹次
韻奉荅

忽見新詩慰闊疎
好懷憐爾獨思予
無由橫柳同垂釣
依舊庄山借讀書
自惜交情嗟老矣
即今世事轉紛如
西園寂寞梅花路
腸斷春風處士廬

雅安

題破窗風雨圖

幽人高臥窗仍破其奈蕭蕭風雨何寒襲書帷秋氣重
潤侵衣桁夕陽多挑燈看劍聞雞舞貫酒連牀待客過
不道有人青瑣內春風隨夢入南柯

周鼎

寄沂陽劉廷鎮負外

故人相與最從容尚憶論詩向夜中白首無家千里別
青山何處一尊同夢回孤館燈前雨目斷西風塞上鴻
誰識離懷愁絕處野亭依舊穆陵東

秦衡

題燕穆之楚江秋曉圖

幾聲哀角起寒譙一夜青霜脆柳條浦溆未明滄海日
客帆應發楚江潮山經太白西來險鴈轉衡陽北去遙
愧我無才重弔屈忠魂千古有誰招

華仲庸

暮春山中即事

翦翦東風生曉寒羣芳搖落自愁看牢籠詩景無神句

點檢花枝有月丹布穀催耕知雨足杜鵑啼血怨春殘
光陰代謝如彈指短髮刁騷不受冠

姜文震

題秀野軒

聞君溪上結幽居地僻時通長者車山愛夕陽留几席
竹因涼雨潤琴書碧香蟻嫩新筍酒白味羹分小艇魚
我亦有家山水窟十年無地著茅廬

江輻

竹深處詩

萬玉深中構草堂風清幽致逼瀟湘羣龍垂影秋無際
獨客高吟興正長雲壓四簷飄翠雨暑消三伏墜元霜
清芬不許紅塵入寒溢苔花滿石牀

魏奎

秋日訪友席上賦錄似耕漁

開遍芙蓉菊未花杖藜隨意踏江沙水雲遠接青山色
林木深藏處士家酒熟一尊香漉蟻詩成兩袖墨塗鴉

兒童安識吾徒樂只聚飛蚊醉館娃

金信

赤松山

桃源洞裏時一到紫雲觀前今始遊黃冠洗藥丹井水
白羊化石青松丘丹光半夜赤於日天氣五月涼如秋
竹皮之冠小鶴氅何以寘我神仙流

周衡

秀野軒詩

背郭幽居如畫裏，斷林春水綠迴環。
樹連煙外啼猿寺，門對湖中過雨山。
送客馬嘶清蔭去，鉤簾鳥度亂花還。
十年奔走風塵際，肯借凭闌一日閒。

客中九日呈良夫先生

疎疎冷雨濕重陽，遙對青山舉一觴。
白髮又饒今日醉，黃花仍送去年香。
只宜覓句醉秋意，莫作登高望故鄉。
不有幽人相慰藉，客中那得散淒涼。

丘處機

題天壇二首

峩峩峻嶺接雲衢古柏參差數萬株
瑞草不容凡眼見靈禽只傍道人呼
鑿門洞府羣仙降煉就丹砂百怪除
福地名山何處有長春即是小蓬壺

四面諸山若附庸突然中起最高峰
每看晴日移壇影常說寒潭臥黑龍
沆瀣要和千歲藥茯苓先斲萬年松
擬尋活計參真趣又隔煙蘿第幾重

初入峽門

入峽清遊分外嘉
羣峰列岫戟查牙
蓬萊未到神仙境
洞府先觀道士家
松塔倒懸秋雨露
石樓斜照晚雲霞
却思舊日終南地
夢斷西山不見涯

至回紇城暇日出詩一篇

二月經行十月終
西臨回紇大城墉
塔高不見十三級
以甃刻縷玲瓏外
無層級內可通行
山厚已過千萬重
秋日在郊猶放象

夏雲無雨不從龍
嘉蔬麥飯蒲萄酒
飽食安眠養素慵

梁大柱

凝神庵

庵廬占勝倚巖扃中有高人謝俗名書卷獨存標月指
松風聽擬瀉潮聲袖磨銀鼠花生纈墨洒金鸞草間行
回首浮榮空一夢潮光蘸碧遠山橫

張嗣德

灤京八景 錄二首

龍岡晴雪

陰山積雪亘春秋霽景玲瓏燦十洲玉展畫屏當黼扆

翠凝香霧繞龍樓吟懷暖動鼠鬚筆酒力寒輕狐白裘
清暑年年動游幸冰壺六月坐垂旒

灤江曉月

灤江曉月漾琉璃皓景沈沈碧海西
監牧平沙時洗馬趨朝青鎖政聞雞
鐘聲破霧騰珠刹橋影垂虹枕玉溪
夙德詞臣勞扈從恩承紫誥又春泥

馬臻

越中言懷

分甘茅屋老蒼苔不是明時棄不才
避社燕歸楊柳合趁虛人散鷺鷥來
半江落日明漁浦兩岸回潮掠釣臺
吳越爭雄俱一夢年年杜若滿汀開

初春即事

東風又到武林城靜裏看春各有情
怕說利名多晝睡愛尋山水每閑行
傍人冷笑營巢燕求友翻憐出谷鶯
世事不窮時易失翠微深處夕陽明

貴公子

麝沈灰暖瑞煙輕十二闌干轉畫屏翠袖閑調鸚鵡語
牙牌分勝牡丹名半垂簾幕因春冷未放笙歌為宿醒
颭颭流蘇風不定隔牆時送賣花聲

春日寫望

遠山重疊限空明淡拂生綃絕點塵半舸夕陽喧酒客
一樓寒色倚詩人早鶯懷舊隨時至芳草無情著處新
却憶城中有貧者杏花開盡不知春

寄越上友人

分袂沙邊兩歲餘
生涯別後竟何如
雲迷禹穴無來信
秋隔吳山有故居
思斷碧天江漠漠
吟低白日雨疎疎
郊墟昨夜新涼入
珍重佳兒好讀書

擾擾

擾擾行塵應接勞
繇來斥鷃樂蓬蒿
胸中丘壑開圖畫
霞外光陰託酒醪
未必漢廷疎四皓
至今吳地祀三高
功成便合謀身退
緱嶺春風正碧桃

春日閒居二首

滿院春陰半掩扉杏花猶怕曉寒欺
蘚痕帶露侵棋石
山影分雲落硯池貧久家僮生去意
社遲梁燕阻歸期
詩成一餉無人說芳草連天寄與誰

數峯青處敞蕭齋自斫楊枝傍水栽
問字無人攜酒去
消閑有客抱琴來遙汀風急鷺雙起
古岸日斜花亂開
袞袞光陰堪一笑城頭畫角為誰哀

送梁中砥歸句曲

家住華陽第幾峯又將琴劍去匆匆
地浮雲氣連山白

露浴丹光入夜紅千里音塵隨斷鴈百年聚散類飛蓬
吳頭楚尾關春恨盡在鶯聲柳色中

楊花

品題曾入百花名長恨濛濛畫不成
灞岸雨餘黏穗溼章臺風暖撲人輕
緩隨流水知無力閑度高樓似有情
想得山齋清影裏亂和蛛網惹柴荆

蝶

曾隨秦女踏青陽幾被鶯捎出建章
芳草夢寒迷碧色

杏花雨細宿紅香粉凝薄翅春無力恨入脩眉晚斷腸
寄語莫尋歌舞處五侯門第有高牆

雨久江邊餞別

別意千重酒暫停放歌一曲向君聽家貧禮數多相失
雨久支干盡不靈古巷聚人祠櫟社暮潮催客散樟亭
孤帆又傍誰家宿遙見沙田燐火青

新州道中

風沙渺渺客聯鑣時拂吟鞭慰寂寥車馬綠綠酸棗樹

野田青蔓苦瓜苗杜陵老去家何在阮籍愁來氣不驕
自笑閑人閑未得得閑終合隱漁樵

汶上即事

北關言別柳飛絲記得離家月又圓華髮流年身半百
黃塵匹馬路三千戍兵自裹餒糧送津吏遙迎傳驛眠
一夜南風吹汶水古榆深巷已聞蟬

旅興

客中白日送青尊燈下裁書眼漸昏南浦一年雲隔夢

西風萬里月當門
酥凝癭椀茶膏熟
火慢筠籠楮被溫
未覺情懷殊冷落
終身衣食是皇恩

回南

家在錢塘江上春
京華投老獨漂零
玉泉山外雪猶白
金水河邊柳又青
帽底流塵春冉冉
花間行李髮星星
分明記得經遊處
一路吟詩寫驛亭

途中寒食

行裝迢遞轉孤城
一路閑吟緩客程
潑火雨晴錫粥冷

落花風暖筍輿輕感時已悟莊生夢遺俗空懷介子情
只有啼鶯解人意平蕪漠漠兩三聲

野外

野外蕭條景更佳牧童將犢臥晴沙白鷗長遶分魚市
紅杏深藏賣酒家倦向客程添懊惱老看春事厭紛譁
田翁也學青門隱料理荒畦自種瓜

謾成

暖催花雨涇行塵脈脈憑軒欲損神閑憶少年如昨日

只疑樂事是前身黃鸝紫燕春仍好剩水殘山物自新
可惜白鷗波浩蕩扁舟老却釣魚人

春日獨坐言懷

昔日歡娛憶此身名園歌舞接芳辰蟄雷夜送催花雨
香逕春迷闌草人合省樓臺形勢壯風流鶯燕語言新
眼前舊物渾狼籍休怪提壺勸客頻

桃花

淺碧繁紅又滿枝化工消息本無機
豔滋曉露鶯搖落

香漬春泥燕掠歸金谷園中芳草在元都觀裏昔人非
自從雲隔天台路劉阮如今夢亦稀

行春

行春無侶自遲留汀草汀花暖更稠馬援近來成矍鑠
謝安應合減風流乍驚語燕穿人屋無賴游絲絆客舟
老我光陰忽如此不拚尊酒復何求

閒居自遣

喜無軒蓋款柴荆靜裏天機見物情德愧王良千里馬

食無婁護五侯鯖海翁豈為鷗防慮稚子休烹鴈不鳴
一笑行藏頭已白新涼又到讀書檠

送楊仲弘之京

迢遞官塘官樹陰征鞍催發短長亭荆吳雨漲河流白
齊魯春歸岱嶽青玉宇風雲開北極金臺日月聚文星
近聞下詔求賢急劉向終須論五經

和仇仁近歲暮見寄韻

瑤琴三疊此心閑目送飛鴻信手彈千里故人行自遠

一聲白雪和應難
賀公歲晚稱狂客
鄭老才高只冷官
且向吟邊了身世
西山暮雨卷簾看

越上感懷

曾負琴書到越中
別來三十五秋風
江山有待客回鴈
歲月無情類轉蓬
禹穴荒煙寒木老
鑑湖舊水野田空
騎鯨人去知何在
擬向沙邊問釣翁

山居寫興

人事喧喧任奕棋
青山數畝是歸期
分將藥草鋤雲種

買得松杉趁雨移，老去故人多入夢。
愁來閑事總成詩，芒屨布韞身猶健。
十里莎隄信杖藜。

幽居

一徑荒涼長碧苔，竹門斜對遠山開。
自操清白傳家譜，不受青黃致木災。
穴鼠苦銜詩藁去，溪螯喜薦酒尊來。
東籬滿地金錢菊，多謝西風為翦裁。

和山村見寄詩二首

休將野服染緇塵，大患須知為有身。
藥餌任從留過客，

是非終不到閑人山中相隱懷弘景谷口躬耕羨子真
午睡醒來春事晚枝頭梅豆已生仁

不成一事鬢先皤朋友惻惻喜琢磨千里音書歸鴈少
滿城風雨落花多迸階新筍微過竹脫繭春蠶欲變蛾
惆悵少陵身老大壯心激越醉時歌

秋日閑詠

西湖晴雨畫圖間坐倚闌干自解顏無酒可供千日醉
有錢難買一生閑草衰春色來時路鶴宿秋聲起處山

橫笛吹殘天又晚
釣舟燈火入蘆灣

吳全節

崇禧觀

曲林古觀水西流
天遣皇華駟玉蚪
高士遠分龍虎派
哲人久伴鳳皇游
樓臺山色三峯曉
池館泉聲五月秋
雲峯凝香浮洞府
坐令和氣藹丹丘

送原功太監南歸

漸覺文星闕下稀
奎章兩見送行詩
渭城朝雨歌三疊

湘水秋風賦九疑國典紬金藏鳳闕詞臣步玉郎龍墀
席前時有蒼生問可向江南久別離

送虞伯生使蜀

送別應思舊所經秦川花柳短長亭三峰高拊仙人掌
萬里先占使者星錦水東流江月白潼關西去蜀山青
當年不盡登臨意待爾重鐫劒閣銘

題饒氏雨樓

夜夢蒼虬遶屋梁曉看飛雨灑浪浪潤涵琴調清風遠

涼入書聲白晝長
翠壁凝雲流石乳
綠疇翻浪沃金穰
何時翦燭西窗下
却聽檐花共醉鄉

題葉氏四愛堂

方今文采重奎章
光照芝山四愛堂
梅蕊春融冰雪界
蓮花晚靜水雲鄉
湘纍往矣蘭為佩
陶令悠然菊泛觴
千古高風猶一日
迢迢歸夢楚江長

玄妙觀

榴皮書壁走龍蛇
池上芭蕉又見花
北闕恩承新雨露

西湖光動舊煙霞春風日長元都樹秋水星回碧漢槎
修月功成三萬戶蕊珠宮裏誦南華

季境舍人歸維揚朝中名公各贈以詩看雲八
十翁閒閒吳全節作唐律一首以授之

相君五馬牧饒時玉樹秋香生桂枝日麗鳳毛延世澤
風培鵬翼運天池平山堂北看紅藥析木津頭識紫芝
文獻通家遺一老塗鴉贈別寫烏絲

繁禧觀

門前流水泛桃花回首蓬山別一家曾把金莖餐沆瀣
閒揮玉麈看琵琶火存丹鼎春長好卷掩黃庭日欲斜
心與江湖天共遠大開瀛海駐吾槎

子昂諸賢賦天冠山五言詩二十八首模寫已
盡矣余遂作唐律一章題卷尾云

青山特地聳天冠聞說羣仙駕紫鸞浮世黃金空白髮
倚雲蒼玉尚元壇松根怪石千年化櫓頂飛泉六月寒
弘景定辭神武去鷗波浩蕩錦江干

壽慶堂

堂成仙子捧流霞
文物衣冠見世家
江上青山如玉壘
山中白石亦金華
雲連壽櫟千年樹
日映蟠桃幾度花
天府歸榮傳錦里
行看丹鳳降黃麻

薛元曦

送文郎中奉使交趾

天子龍飛統萬邦
玉符封檢下殊方
遠人盡是雕題獠
奉使唯應粉署郎
翡翠飛時銅柱濕
鷓鴣啼處石門荒

炎風苦雨煩珍重
萋葉檳榔取次嘗

送陳都事使雲南兼寄李仲淵廉訪

送君銓選使滇池
部落諸賢想自題
明月先經夔子北
長風却度夜郎西
山橫塞雨驂騑滑
花發蠻雲杜宇啼
為問霜臺李廉訪
白頭官滿尚羈棲

宋顯父祕書惠海子北門之什次韻荅之

得君佳句見君情
春半閑從海上行
紅杏啼鶯沙苑遠
綠楊嘶馬漢堤平
玉山地勢連雙闕
金水河流注夾城

萬乘以仁懷遠邇遊觀宜著魯諸生

送朱本初之玉隆堂

西山紫翠簇芙蓉師住逍遙第一峯
慎勿挽弓思射鹿祇須鑄鐵學降龍
閒穿曉月鉏靈藥醉拂秋風臥古松
應憶京華舊遊處蓬萊坊畔五雲重

題劉京叔歸潛室

獨構茅堂養道真滿前俗事罷紛紜
磻溪夜釣波心月汾曲春耕隴上雲
長笑熊羆勞應夢直教猿鶴怨移文

近來傳得安心法萬壑松風枕上聞

萬歲山次韻

萬歲仙山聳碧空廣寒春殿最當中橋連綺石通三島
路遶銀河接兩宮柳拂甘泉巢翡翠花凝太液下冥鴻
年年此地經遊輦自是承平樂未終

張舍人遙碧樓

西北高樓入九天楚雲吳樹淨娟娟玉浮翡翠流青草
金削芙蓉列紫煙方匱尚藏周典禮故家猶繼漢神仙

想應公子登臨處明月吹笙彩鳳旋

慶黃晉卿任江浙儒學提舉

憶昨追隨到上台鰲頭先奪錦標回道人獨寶籠鵝帖
天子曾驚倚馬才禮以二儀宗太極名因三賦重蓬萊
只今教雨司吳越絕勝文翁化蜀來

大駕度居庸關

居庸雄據萬重山南北門分作漢關鼓角動時森虎衛
旌旗行處識龍顏禪宮路轉風煙合御苑春深草樹閑

待得長楊圍獵罷又隨車騎此中還

次韻王侍郎上都見寄

灤水東風淨物華石鼇峯下駐仙車
清明草檢歸黃閣勝日開筵近紫霞
萬戶砧聲聞別館九天秋色落誰家
仙郎賦罷長回首南去還乘八月查

寄贈華陽洞隱者

歸去華陽古洞天高情蕭爽絕凡緣
牽蘿石壁書紅葉散髮雲林臥紫煙
長史玉經何日降隱居真訣至今傳

江東却擬尋君去
合景回風問上元

黃石翁

碧桃

洗盡嬌紅出翠帷
玉人無語背斜暉
綠華前度通仙譜
天水何年染素衣
宴罷瑤池春夢斷
影寒姑射夜深歸
禁煙時節多風雨
莫遣繁英一片飛

張雨

馬塍新居

浮家泛宅意何如玉室金堂計未疎歸錦橋邊停舫子
散花灘上作樓居澹然到處自鑿井元宴閉關方著書
但得草堂貲便足人間何地不樵漁

西湖放燈

共泛蘭舟燈火鬧不知風露溼青冥如今地底休鋪錦
此日槎頭直掛星爛若金蓮分夜炬空于雲母隔秋屏
却憐牛渚清狂甚苦欲燃犀走百靈

次韻段推官觀潮

雪濤卷入白螺杯，雲夢吞將濫觭堆。
陳馬直從天漢落，颶風先自海門來。
青山一向開銀壁，黃纈中央立露臺。
好在畫圖留壯觀，江頭白首不堪回。

次韻虞公和斷江和尚種松

松下微吟愜病悰，支離潦倒似支公。
項因巢鶴翻成結，心為依禪畢竟空。
陸子壇前春古淡，葛洪井上雨青葱。
茯苓乞與楊員外，誰復緘詩過浙東。

遊華藏寺

湖上亂峯如髻鬟湖邊才子駐春鞍霜餘鸚鵡沙汀淺
日落麒麟墓道寒古壁風篁無盡意清尊雲海有餘歡
遠遊未羨鴟夷子直向飛仙乞羽翰

題雪景三香圖二首

春雪無聲入畫堂東風渾似北風涼祇緣何遜題詩少
信是徐熙落墨強青鳥下迎羅襪步蒼髯來近玉臺妝
庄廬也入幽閨夢睡裏山花各自香

雪羽飛來雪意濃國香狼籍暝煙叢倩誰與翦吳淞水

愛爾能吟柳絮風翠袖佳人玉跳脫平頭奴子錦熏籠
劍南畫手看前輩著粉施朱或未工

范以善雲林清遠館

華陽范監居幽眇不到元窗未易逢山氣半為湖外雨
松聲遙答嶺頭鐘常聞神女騎龍過亦有仙人控鶴從
安用乘流三萬里小天元在積金峰

舟次潞湖用柳博士夢薛元卿詩韻寄倪元鎮
兼懷鄭明德

遠思重逢茅小君香銷酒盡路三分五湖歸思浮天水
一霎秋陰過雨雲柳子篇章渾可法花奴絃索共誰聞
惟應自洗唐溪石填得金泥小篆文

次韻劉伯溫御史春遊

草木幽馨澗道微白雲拄杖去如飛獨尋玉女洗頭處
相伴仙人採藥歸幾疊翠微深杳杳一簾紅素亂霏霏
何堪酒債兼詩債老却江南白苧衣

題范德機編修東坊橐後

一編上有東坊字慚愧詩中見大巫直想瘦生如飯顆
竟從癢處得麻姑咸池水淺孤黃鵠空谷天寒病白駒
擬共風流接尊酒祇愁塵土沒雙鳬

三月病懷

煮藥香中聽雨眠都緣未熟養生篇雪消春水深三尺
日上花陰過幾輒世事悠悠高枕外衡門寂寂暮霞邊
自慚病鶴摧頽甚却顧雲霄意悄然

吾愛吾廬

吾愛吾廬聊復爾眼前白石與蒼苔水從林木陰中過
風自房櫺曲處來薄有餘情歸竹素竟無長物受塵埃
先生閉戶成真嬾詩債敲門不厭催

乙亥二月還錢塘書懷寄劉師魯

黑頭時與王孫別春草又生天一涯貧甚馮驩猶有缺
歸來丁令已無家葑田湖窄殘舟少墓道山荒剩屋斜
還憶菌巢書數卷雪麋應護手栽花

雪麋元洲
白犬名也

十二月五日雪晴

日光玉潔千峰立快雪晴時一氣凝
當晝爐亭催埽巷
犯寒魚榜借收冰
松皮石裂號飢鼠
窗隙塵消觸凍蠅
青茁菜芽渾可愛
倩誰春餽卷紅綾

鐵笛道人新居曰書畫船亭作詩以寄

蘇州去訪揚雄宅近水樓居似月波
東府官曹知者少
西山爽氣望中多
臺招天上仙人鳳
池養山陰道士鵝
誰和涼風吹鐵笛
莫愁艇子柳枝歌

荅董子羽見寄

清都間已住多年鶴駕鸞驂與後先閭闔五雲宮樹暖
蓬萊初日羽衣鮮神仙翰墨唯皇象史館人材總孟堅
天上春風如舊識殷勤吹送寄來篇

再次韻實刺巴勒郎中春遊二首

楊柳三眠午未醒楊花飛雪散星星海中蜃氣春浮島
月下胎仙夜降庭尺素書來雲錦織紫鱗躍處浪紋腥
樓前政有三珠樹翦斷西山一半青

鄰近桃源雞犬家不緣迷路得看花衣裳總溼三危露

服食惟消五色霞
鶴塚浪磨崖上字
漁舟潮閣渡頭沙
石盤棋子都狼籍
莫向人間問歲華

八月十五夜待月

移牀露坐閑臨水
浴鵲灣頭足芰荷
秋已平分催節序
月還端正照山河
老憐宋玉生悲思
狂憶桓伊作浩歌
雲漢茫茫一卮酒
白頭慚愧古人多

碧筒飲

採綠誰持作羽觴
使君亭上晚尊涼
玉莖沁露心微苦

翠蓋擎雲手亦香
飲水龜藏蓮葉小
吸川鯨恨藕絲長
傾壺誤展淋郎袖
笑絕邪溪窈窕娘

上京賜宴王眉叟有詩次韻

從事何緣過草堂
行都遣賜玉壺方
遠勞使者紅塵騎
爛煮仙家白石羊
中聖敢辭千日醉
承恩獨許四明狂
金莖賸有三清露
潤及葵心向太陽

次孫大方仙興詩韻

仙仗來時瑞霧屯
真人玉女侍靈軒
亭亭珠穗香煙直

爛爛扶桑玉色溫
花雨埽塵鸞帚溼
島雲承轡蜃樓昏
至今星斗天壇夜
望拜青都虎豹門

送人之茅山

挑竹齊眉草屨柔
江雲曉溼木棉裘
茅山一去五百里
楚月相望十二樓
林下甌香黃獨月
松根鉏冷茯苓秋
藥瓢料得歸來滿
多病微軀我亦求

雨裏郭子昭御史

洞戶霾雲晝不開
大茅南面水縈迴
深山此日蛟龍喜

舊雨故人驄馬來澗道浮槎高寄樹石幢陰篆溼生苔
銷愁底用金陵酒騰引窪尊枕瀑雷

次韻荅吳興黃伯成

行盡松陰黃葉株三义路口問茅廬青山對語惟捫虱
落日催歸獨跨驢土木形骸嵇叔夜波瀾文字木元虛
殘年記得相存問莫道天寒無鯉魚

丹陽道中觀稼

行遍山東黃葉村縱橫草路細難分荒雞戶暗蟪蛄月

落鴈天黏穠稭雲下澤車傍縣酒榼延陵詞畔讀碑文
空山更覓牛羊逕入獸依然不亂羣

賦西塞山送趙季文湖州學錄

往來苔雪舊山川流水桃花思杳然溪女浣紗春雨後
仙人把釣夕陽邊漁歌未用朝廷覓惠政先繇隱逸傳
不信青衫浣塵土水晶宮裏住三千

猿臂笛

三峽家山已隔生一枝玉骨尚堪橫攀援遠似穿雲曲

吟嘯高于噴竹聲
栗葉霜黃天竺夢
梅花春老玉關情
伶倫且為相娛樂
誰問將軍善射名

夏商隱還京師

扈蹕行營三十載
王門不肯曳長裾
閑從角里先生飲
與說圯橋父老書
花外飛丸紅叱撥
月中采藥玉蟾蜍
殘骸尚有刀圭分
曾向南山訪敝廬

和率性大滌十詠

錄四首

鳳洞

第幾峯前蒼玉洞何年于此鳳求皇
梧枝宿久毛皆變竹實餐多髓亦香
露溼紫苔春似錦月明丹穴夜生光
我亦鷄行舊儔侶雲中有路共回翔

翠蛟亭

誰見蒼龍劈石開此峯元自勝飛來
闌干截斷山頭雨
鼎鑪翻將地底雷寒甚祇疑雲是雪
霜餘每恨葉成堆
坡仙獨對無言說慚愧搜詩日幾回

丹泉

涵渟萬象一泓中欲探靈源未易窮
丹窖久埋泉眼赤珊瑚長浸石頭紅
評來水味羞揚子收拾砂牀贈葛洪
一醉流霞三萬日年年分給羽人宮

天柱峯

此峯屹立浩無前信是人間別有天
銅柱何煩天北際蓬山寧在海東邊
采樵巨弱多無骨擣藥靈禽或是仙
老我不能為狡獪峰頭看月幾回圓

金陵僧來聞笑隱住持事繁風雨有懷

憶曾共坐繡經石語我松華壓酒方一自宜城居輔國
幾時天竺話連牀栖栖春草元桑楚歷歷風鈴替戾岡
乞得江東今夕雨與君聊洗夢中忙

後魏沙門法果為
輔國宜城子加侯

封蓋浮屠
爵秩之始

閏三月三日北山看花不與盟

應笑黃花厄閏時後三仍復負芳期老無劉几簪花分
閑有陶潛止酒詩穀雨中先紫筍鬱岡山口足黃鸝
韓湘自債奴星去袖得瑤臺第一枝

盧大雅

舟中寄散木張外史

擢郎催踏春溪舫阻我辭君散木亭
江水未應春去漲鄉山偏向別時青
煙波釣艇新衝雨河漢仙查舊犯星
輸與仙都吉居士一簾山雨聽鵝經

薛毅夫

毛道士石田山房

數畝依山宅一區喜存硤确勝膏腴
近因辟穀懷黃石

也復耕煙種白榆玉氣潤多山水秀松雲飄盡鶴巢孤
會當脫屣從師去乞取青櫺顙顙珠

荅虞叔勝用文靖公韻

青城文思涌波濤子復長吟海上遨瞻望白雲歌伐木
記從瑤島得餘桃百年風雅誰能記萬里煙塵共此逃
不是菊花知節序一杯負却蟹雙螯

富恕

垂虹

坤軸東南岸兩端巨靈擘華壓平川玉鯨偃蹇吞三峽
彩蛺連蜷落九天有客吹蕭明月下何人釃酒大江前
闌干三百風煙晚獨立蒼茫歌洞仙

于立

簡玉山

我離城中五十日念子終日不相忘驛回隴首梅未發
鴈過沙頭書幾行田間雞黍酒正熟霜後園林橘半黃
亦欲歸栖同一笑酣歌不減少年狂

次友人韻

落日晴江好放船西風蒲棹未須牽鯨鯢已靜波澄海
鴻鴈初來水接天過眼風光如隔夢近人風月也堪憐
歸來尚有黃花在暫醉佳人錦瑟前

伏

留題雲巖寺

闔閭陵谷是茲山往往遊人不厭看草長荒丘曾虎踞
藤牽古木作龍蟠七層宰堵穿雲破百尺轆轤翻水寒

今古入吟無限意海天秋色滿闌干

圓至

送建昌黃綺秀才踰淮教授

還山羞聽紫芝歌旅館千門講四科絳帳未懸知己少
黑裘漸敝閱人多秋風白下沾巾別落日青淮照影過
莫對飯盤嗔苜蓿桑榆雖暖易蹉跎

英

夏晚泛湖

楊柳陰中艤小船
芰荷香裏聳吟肩
雷聲驚起雲頭雨
塔影倒搖波底天
羣鷺遠明殘照外
一僧閑立斷橋邊
菱歌裊裊知何處
滿袖清風骨欲仙

客夜憶傅森

深夜相思浣水邊
情懷堪恨復堪憐
雲山千里書不到
風雨一樓人獨眠
蛩帶秋聲吟壁下
鼠窺燈影出窗前
去年記得西湖上
醉倒荷花香滿船

善住

春杪登蘇臺

獨上高臺小凭闌
荒城寂歷水雲寬
連天芳草雨初霽
滿地落花春又殘
白髮不生還亦老
青山無事且須看
吳王伯業消磨盡
江鳥呼風野樹寒

送人還山

茅茨拋在翠微間
即粟橫肩又獨還
松樹別來巢鶴大
銅瓶歸去蟄龍閒
西風黃葉埋寒徑
落日青猿叫亂山
後夜月明誰是伴
枕前飛瀑響潺潺

送人入杭尋弟及謁山村先生

之子難忘骨肉情，遠尋仲弟入杭城。
好山半向舟中看，佳句多於枕上成。
驛路牛羊歸暮色，江橋鼓角動秋聲。
端淳耆舊今無幾，為問湖邊老淨名。

過石湖

十月吳皋霜露零，田家收稻滿柴局。
湖中浪擁銀花白，天末山橫螺髻青。
寒色亂雅飛笠澤，夕陽衰柳並旗亭。
何時覓得清遊伴，更買扁舟過洞庭。

登報恩寺閣

高閣閑登四望寬
青山極目倚雲端
水村漠漠連天遠
隴樹沈沈帶雨寒
罷馬嘶風春草徧
倦鴉歸堞夕陽殘
豈知大道平如掌
今古人間行路難

舟次江亭

歸思悠悠極渺冥
暫維舟楫並長亭
春江水暖蒲牙白
野岸煙銷柳眼青
鳴犢帶聲登廢壠
征鴻和影度遙汀
不知何處吹銅角
獨立天涯淚欲零

月夜

明河如練月如弓涼葉蕭蕭下遠空
水國正秋無過鴈苔堦終夕有鳴蟲
故人自隔關河外往信猶存篋笥中
一盞青燈伴孤寂夢回吹殺破窗風

京口

車聲軋軋紅埃北馬南帆日夕來
淮甸雪銷江水漲海門月上楚天開
堤邊行飯多逢柳野外尋詩不見梅
會散金山即歸去春風催我上琴臺

次山村先生韻二首

嚴陵臺下水潺湲漠漠高風去不還處士隱廬遺路側
永公書甕出松間山田磽瘠民生儉郡邑蕭條吏事閑
幾欲清遊身未遂煙霞盤礴鬢毛斑

定起空山尚有星悲茄杳杳上青冥間燈暗鴉啼樹
池上月涼魚闖萍文錦薦枰風字研綵繩穿夾梵書經
舌端解使天華墜爭似無言對翠屏

錢塘阻雨寄山村先生

客窗燈暗曙鐘殘泥潦從衡路未乾蒲目雲山留我好
一樓風雨見君難湖邊雪盡梅應早吳下春遲麥尚寒
南渡者英久寥落豈知猶有故衣冠

如鏡師翦竹四竿植為蒲桃架其一適活要予
賦詩遂作此以塞請云

蒼筤翦得出遙林架就危棚近辟陰柔蔓未垂珠落落
短梢先挺碧沈沈月明亂影翻秋几露冷清聲入夜琴
養取閑門表孤直莫教容易俗塵侵

經故人所居

桃花灼灼柳依依
院落荒涼晝掩扉
石沼水乾魚逝久
杏梁巢覆燕來稀
隴頭未說人澆酒
世上先傳客賣衣
欲對東風寫離恨
郡譙吹角暮雲飛

落梅

晴雪霏霏灑砌苔
浪蜂欲去更徘徊
空傳淡影浮歌扇
不送寒香入酒杯
隴首故人千里隔
江南驛使幾時回
翠禽莫怨高樓笛
一度春風一度開

春晚

矮窗日月無今古
閉戶爭知春去來
清鏡靜臨多白髮
好花閒看半蒼苔
鼉傳鼓吹池塘雨
茶展槍旗澗壑雷
海燕未回寒尚在
暮雲重疊鎖崔嵬

苦雨

積潦橫流路不分
滿空煙靄暗朝昏
烏鳶跼跼隨荒圃
風雨蕭蕭失遠村
芻米價騰愁白屋
管絃聲沸醉朱門
無言桃李參差放
似怯春寒欲斷魂

自陽山歸舟中作

小麥青青大麥黃
澗松風急夜聲長
屨穿細路春泥滑
花落清渠野水香
嶺上獨留雲作蓋
村邊多見石為梁
楓橋寺轉閭門近
回首西山已夕陽

山中


寂寥空谷久相容
行道何須向別峯
山腹引泉因煮茗
嶺頭乘雨為栽松
倚天傑閣巢靈鶴
徹海澄潭臥毒龍
樵客豈能知住處
草堂終日白雲封

御選元詩卷五十八

謹案第四十三頁前四行回首西山已夕陽刊本
已訛一據谷響集改

謹案卷五十八第三十一頁前四行實喇巴勒舊
作沙刺班今改

[illegible]



總校官庶吉士臣侍朝

校對官檢討臣蕭九成

謄錄監生臣朱文佐